

四庫全書

集部

欽定四庫全書

集部

梁谿集卷九十二至
四

詳校官庶吉士臣張溥

侍讀臣孫球覆勘

總校官知縣臣楊懋珩
校對官中書臣潘奕雋

謄錄監生臣楊汝梅

欽定四庫全書

梁谿集卷九十二

宋 李綱 撰

表劄奏議五十四

獎諭防秋利害詔書 謝獎諭表

再陳己見劄子

乞降旨岳飛遵依聖旨差兵屯戍江州奏狀

施行招軍奏狀

乞遣兵收復光州奏狀

乞遣兵策應岳飛奏狀

乞蠲免淮衣紬絹奏狀

乞將戶帖錢分作二分隨秋稅起催給賣奏狀
乞施行虔州不發將兵奏狀

獎諭防秋利害詔書

勅李某省所奏陳防秋利害事具悉卿勤勞王室作時
股肱控制上流實邦屏翰方朕親乘戎輅撫勞江干乃
遠抗於封章仍備言於謀略洞明利害切中事機冠已
在吾目中何煩聚米肉方陳於几上可以行師嘉爾壯

猷副予廷望故茲獎諭想宜知悉冬寒卿比平安好遣書指不多及

謝獎諭表

臣某言伏奉詔書以臣奏陳防秋利害切中事機特加獎諭臣已望闕謝恩祇受訖者瞽言之達方虞出位之誅溫詔誕敷更被自天之寵載惟叨冒深切凌兢中謝伏念臣識慮迂疎材能譾薄所願學俎豆之事未嘗讀孫吳之書偶當戎事之艱危輒罄愚情而忖度惟憂國

愛君之心切故苦口逆耳之言多亮之者謂懷匪躬之
誠笑之者謂犯斯疏之戒但知自竭豈暇恤他正如野
老之獻芹敢意聖君之采菲伏蒙皇帝陛下天地容納
日月照臨嘉其千慮一得之愚獎以細書十行之札褒
踰華袞賜重萬金蔀屋為之生輝士民忽焉改觀臣敢
不激昂素志砥礪孤忠益思料敵制勝之謀以助禦侮
折衝之計靈旗所指方勒燕山之銘崖石可磨願撰涪
溪之頌

再陳已見劄子

臣今月十日准御前金字牌降到樞密院劄子奉聖旨以臣奏陳防秋利害切中事機令學士院降詔獎諭劄送臣照會仰荷聖恩第深感懼伏念臣罕識寡聞初無智略徒以誤膺知獎實同安危故敢每以瞽言干冒睿聽伏蒙皇帝陛下天地容納日月照臨不惟恕其狂愚又復獎以優詔顧臣何人可以當此惟知自竭以報鴻私臣竊見國家與寇偽相持累年以來未有如今日之

捷也原其所以致此蓋緣六飛親臨將士用命之故倘
非車駕在近威令可行則淝水之師安能既退而復進
變敗而為成哉前年親臨則寇騎宵遁今年親臨則偽
齊奔北其效昭然可見臣願陛下乘時稍進以臨鎮江
號令王師士氣益振則雖黠寇陰遣援兵未必不聞風
而退屈昔漢祖親臨垓下而西楚以亡真廟親臨澶淵
而北戎以服自古創業中興之主未有不履危而求安
者惟陛下斷以不疑布昭聖武以定大業天下不勝幸

甚臣又竊思國家近年以激勸將士之故每一戰勝則不計首級全軍推賞習以成例帑藏爲虛今者諸將咸捷當行慶賜欲廣其施則懼物力之不給欲小其賜則懼士心之未厭此尤所當慮者也夫人情感激有不待賞而勸者推賞先後有未下車而封者臣願陛下降哀痛之詔憫將士罹兵革之苦凡死於戰陣先加封爵厚賂賻贈收卹其家死者哀則生者勸矣然後明詔統帥審定功狀俟防冬解嚴慶賜併行其誰曰不然昔句踐

厚養死事而士卒思奮漢祖先封雍齒而反側者安急
先務也臣愚不達大體惟陛下裁察塵瀆天威無任惶
懼戰越之至

乞降旨岳飛遵依聖旨差兵屯戍江州奏狀

契勘本司累具狀奏聞乞差撥本路防冬軍馬雖奉指
揮許行差撥至今未蒙差到及近降指揮令岳飛分一
項軍馬屯駐江州至今亦未到來止是差到兵將於蘄
陽駐劄人數不多竊緣偽齊賊馬北來侵犯淮西雖為

諸將殺敗遁歸淮北然賊情狡獪防冬日月尚遠沿江
一帶合行控扼去處理宜隄備今來不敢更望朝廷遣
兵只乞降旨岳飛遵依元降聖旨差撥軍馬於江州屯
戍與蘄陽水軍相應庶本路緩急有所倚仗不致誤事

小貼子

契勘今月十二日據蘄州申岳少保自江州復回鄂
州所有元差將官王瑩在蘄日屯泊一項水軍並已
帶回即是沿江一帶並無軍馬屯駐緩急深慮誤事

伏望聖察早降睿旨施行

施行招軍奏狀

近准樞密院劄子樞密院勅會諸路州軍多有西北流
移人民竊慮闕食因而失所理宜存卹兼諸路州軍見
管禁軍比緣兵火之後例皆闕額雖已降指揮招填並
未見招到人數三省樞密院同奉聖旨令諸路帥臣行
下諸州軍委自守貳將西北流移無歸人民情願充軍
堪披帶少壯人疾速措置招填闕額禁軍並日下放行

請受本司已遵依施行專委洪州鈐轄兵官措置招填
至今多日未見招到人數尋行詢問蓋緣西北流移人
民日望朝廷收復中原得還鄉土不願於東南州軍充
填闕額禁軍實恐將來收復之後既係兵籍難以還鄉
却願投充統制官申世景軍中他時移易屯戍有可歸
之理契勘申世景一軍所管止千餘人數目不多本軍
先具申明朝廷乞添差人或許招收人兵使喚續准朝
旨候到江西別聽指揮本司近再備據本軍陳乞上項

事理於七月十八日供申樞密院至今未奉回降指揮
今來西北流移人民在本路頗多若不依近降指揮招
收竊慮饑寒失所或致流為盜賊委實可憫如蒙許行
招填申世景軍中即乞通舊人以二千五百人或三千
人為額庶幾日加訓練漸成精兵與本路隸將不隸將
兵相兼使喚可以捍禦一方不致臨時更煩朝廷遣發
人馬仍乞所招填人止刺手背將來收復中原可以給
據復歸農畝實為利便伏望聖慈特降睿旨詳酌施行

乞遣兵收復光州奏狀

今月十一日據興國軍申據進武副尉本軍指使何詮
申報到下項

一今月初一日光州探事人翁進等回申供於十月
二十二日蒙本州差與使臣張準等前去舊光州
探事至二十三日夜昏黃到光州西城廂聽得城
上發擂打更遂令趙青先回前來本州報覆進等
去州綽人問信不曾捉得人只見城上四壁有火

明打更不見城內人馬數目的實首領姓名却揭到偽齊懷信縣事總領軍馬膀一道赴州取覆

一今月初七日光州探事人張真等回申供十月二十六日蒙本州差去舊光州探偽齊賊馬動息真二十八日早日出以來到州南七里岡奔城去時只聽得光州城上見真等打鑼真等為人少不敢近城前去只見城上有白旗十餘面不見得城裏賊馬數目首領姓名

一十月二十九日有光州光山縣徐知縣管押公吏
民戶前來光州移治山寨處稱十月二十七日有
偽齊占據光州賊馬綽巡前來光山縣趕趕殺奪
人戶其時徐知縣下弓手等人見陣其賊兵復回
光山縣放火燒毀屋宇前去

一光州再准淮西宣撫使司劄子指揮稱契勘光州
今來賊已退別無警急當司已於今月十六日三
次劄下本州依舊移回光州安泊治事去訖並不

見申到知稟須至指揮右劄付知光州王敦武依
累次指揮疾速施行具知稟狀申照對今來光州
見被偽齊賊馬占據目今未曾移回前去

右本司契勘光州昨因移治自知州以下並徙居山寨
為使臣闕寔等據城反叛投順偽齊近承淮西宣撫司
公文已殺敗偽齊賊馬退歸淮北皆已淨盡今據前項
興國軍探報其光州依舊係偽齊賊馬占據未曾收復
竊緣光州係在淮河之南與偽境陳蔡相接今來若為

偽齊賊馬所據便可於淮河繫橋般運糧食濟度軍馬
向南作過與蘄黃為隣更無控扼去處深慮為患不細
欲望聖慈特降睿旨下淮西宣撫司遣發近上兵官統
領精銳軍馬前去收復於日近了當庶幾不致為一方
之患

乞遣兵策應岳飛奏狀

臣十一月十九日據岳飛公文今月十二日據統制官
寇成等四狀申稱自虢州獲捷之後再撫存商虢西京

長水福昌永寧伊陽一帶百姓了當於十月二十七日探報蕃偽賊馬侵犯鐵領關其把隘鄉兵統領申稱賊馬厚重支吾不往成等所統人馬不多遂移寨前來橫澗設伏隄備於二十九日有馬軍千餘疋前來見陣掩擊敗走殺死賊兵百餘人奪馬二十餘疋內辨認得有蕃人三二十人至三十日有馬軍二千餘騎再來衝突成等鼓率官兵向前迎敵掩殺賊徒退走殺死數十人活捉八人內七人係蕃人重傷相繼皆死問不得蕃人

頭領姓名一名係劉豫人高收通說得蕃人有一萬五千餘人馬有三千餘足劉豫有二萬餘人馬有二千餘足依舊係偽王太尉韓觀察傅安撫成大尹等統率當時追趕間其賊衆埋伏數路分頭一布前來成等為見賊馬勢重即時拽領軍馬於朱陽五里川擇利下寨伏乞使司火急星夜差發軍馬前來救援同日又據商州駐劄準備將賈彥十一月初一日申番偽賊馬一萬餘人已犯商洛縣又據統制官王貴十一月初四日申何

家寨偽五大王聚集蕃偽賊馬重厚亦有在舊唐州下寨侵犯襄陽界分并鎮汝軍賊勢重厚見侵犯鄧州界作過貴雖已遵依使司差到幹辦于大夫備傳指揮措置事宜更乞疾速差發軍馬前來同共掩擊并於十一月十一日據統制官崔邦弼今月初六日申賊馬侵犯信陽軍作過遣發將官秦祐於長臺鎮殺散賊馬追趕至望明港大寨為見賊馬衆多却拽領軍馬回信陽軍下寨伏乞使司疾速添差軍前來同共掩殺飛契勘諸

處申賊馬分路前來侵犯意欲決圖上流飛雖目疾未
安不免將帶在寨軍馬過江措置外申本司照會臣契
勘寇偽并力侵犯襄鄧信陽軍等處兵勢厚重謀慮非
淺今來岳飛雖已前去措置掩擊緣荆湖接連江西一
帶地里闊遠竊慮孤軍緩急難以捍禦伏望聖慈速降
睿旨令劉光世遣發軍馬前來策應及命重臣統大兵
屯駐九江督戰庶幾上流重地不致疎虞再獲大捷天
聲益振恢復之功在此一舉乞賜留神幸察

乞蠲免淮衣紬絹奏狀

契勘洪州以前年例樁發淮衣紬絹二萬四千餘疋自
經兵火殘破之後不曽收樁自紹興二年已後至今年
各蒙朝廷蠲免起發今來近准指揮令本司預將紹興
七年分淮衣紬絹折納米斛緣上件紬絹本州已累年
不曽收樁起發委是無可拘催折納欲望聖慈特降睿
旨將本州來年分合發淮衣紬絹之數依已前年例蠲
免施行

乞將戶帖錢分作二分隨秋稅起催給賣奏狀

勘會本路見依奉朝廷指揮措置出賣戶帖內去年旱傷及四分以上州縣依元降指揮候今年起催秋稅日給賣臣契勘本路去年亢旱比之他路尤甚內洪吉筠袁江撫州興國臨江軍皆是災傷至重有及七八分去處鄉民大段貧困其間有逃移之人尚未盡能復業雖今秋豐熟緣春耕之時正在闕食穀價翔踴人戶無本作田所種不多私債甚重民力未至蘇醒今來州縣見

行起催會之一路數目浩瀚又緣本路按月起發應副
岳飛大軍錢並係見錢緣此民間難得見錢號為錢荒
兼目今穀價頓減若責令人戶依限併行送納愈見困
弊深可矜憫欲望聖慈特降睿旨下本路都轉運司許
將去年旱傷及四分以上州縣未賣戶帖價錢分作二
年隨秋稅起催給賣如人戶情願以米斛依本處市價
抵頭折納者聽更不收納加耗湊作和糴之數起發庶
幾稍寬民力

乞施行虔州不發將兵奏狀

契勘本司昨准都督行府及樞密院劄子降到指揮本
路將兵遇有緩急許本司全將勾抽使喚及不隸將兵
許勾一半赴本司按閱使喚本司已遵依前項指揮施
行緣東南第六將並無虔吉州駐劄竊慮本州有盜賊
殘黨除存留一半措置彈壓外祇令將一半將兵團結
聽候本司緩急勾抽今年十月內據淮西蘄黃等州探
報寇偽賊馬萬數浩瀚侵犯光州及廬壽等處緣本司

別無軍馬可以控扼沿江要害去處遂劄下虔吉州起發已團結下一半將兵前來應劄分布使喚除吉州發到三百人外其虔州見管將兵二千九百餘人合行起發一半一千四百餘人本州占吝妄以盜賊為名並不肯起發一人一騎本司已兩具奏聞及申都督行府蒙朝廷行下虔州限一日分析不起發因依及都督行府劄子如本司勾抽諸州軍兵守臣輒敢占吝不即發遣自合按劾申奏本司亦累劄下及遣使臣前去催促並

不依應今來淮西等處賊馬已為諸路大兵討殺各已
退遁沿江一帶平寧本司目下不須前件將兵已劄下
虔州權免起發別聽指揮外照會一路將兵依法合聽
帥司節制又有近降朝廷指揮許本司於防秋警急之
際起發使喚其虔州守臣妄以盜賊為名占吝不遣不
惟有違本司節制亦不遵奉朝廷指揮雖今來沿江幸
保無虞竊慮向後緩急之際難以調度及其餘州軍倣
倣解體不復遵稟節制緩急有誤國事臣以人微望輕

不足表率一路已具奏聞乞先次罷黜外所有虔州弛慢官吏已送袁州取勘伏望聖慈詳酌施行

小貼子

契勘洪州北至淮南界二百餘里南至虔州十五餘程將兵盡在虔州防秋之際若不先期起發必不及事兼虔州盜賊比之春夏間十無二三雖有些小皆是殘黨其存留一半將兵及本州諸縣巡尉弓兵又不下千餘人自足措置彈壓今來虔州官吏全不體

念事有輕重妄以盜賊為名占吝不遣若不蒙朝廷
略賜施行委是帥司虛設緩急之際難以任責伏望
聖察

梁谿集卷九十二

欽定四庫全書

梁谿集卷九十三

宋李綱撰

表劄奏議五十五

乞輪差將兵赴帥司駐劄奏狀

奏陳生擒偽齊賊衆劄子

獎諭賑濟詔書

謝獎諭表

乞宮觀奏狀

再乞宮觀奏狀

不允宮觀詔書

同運司乞兵捕虔賊奏狀

乞沿淮漢修築城壘劄子

乞納級計功推賞劄子

乞用瓦木蓋置營房劄子

乞輪差將兵赴帥司駐劄奏狀

契勘洪州未經兵火以前係本路馬步軍都總管司畫
奉聖旨虔州所屯東南第六將兵每上下半年分輪一
半赴洪州駐劄後來洪州經兵火殘破建炎四年內罷

帥隸屬江州路安撫司并撥虔州隸屬鄂州係湖北路
虔州緣此申請續降指揮令洪州將東南第六將起到
人兵盡數掃歸元來去處至紹興元年内洪州復置帥
司係安撫制置大使蒙朝廷差兵二萬人其虔州却撥
隸本路緣已有上件軍馬帥司不曾陳乞依舊勾抽一
半將兵前來更戍今來虔州不知有前項因依習成年
例稱有盜賊占吝將兵不肯發遣洪州雖係帥司其元
差兵二萬人節次撥隸他將祇有統制官申世景計千

餘人委是緩急使喚不足難以分布防秋及彈壓一路
伏望聖慈詳酌特降睿旨許依元降指揮將本路所管
將兵上下半年輪差一半洪州駐劄仍令虔州依舊例
逐旋樁辦錢糧前來支給庶幾緩急不致依前占吝有
誤國事

奏陳生擒偽齊賊衆劄子

臣竊見近日諸將獲捷其捷報內並稱生擒偽齊賊衆
多者以萬數少者亦不下數千人除願充軍外餘皆給

據放散所獲糧斛多者十餘萬石少者亦不下數萬除
給散外盡皆焚毀契勘諸路招捕盜賊即有給據放散
歸業之理今來偽齊賊黨雖元係朝廷赤子緣州縣未
盡收復其給據之人寔無所歸若令依舊歸偽齊州縣
將來不免又被驅脅從軍死於鋒刃誠可矜憫今江淮
間曠土甚多見措置營田全少人夫可以耕作臣愚伏
望特降睿旨行下諸將今後生擒到偽齊賊衆除揀選
願充軍外餘人並管押赴江淮荆湖逐路帥司令措置

分俵充營田使喚寔為利便其所獲糧斛亦乞指揮務令愛惜或可保守或可般運或可給散隨宜措置勿令焚毀以為將來大兵就糧之資寔為得策伏望聖慈特賜詳察

獎諭賑濟詔書

勅李某省所奏賑濟飢民招還流亡事具悉朕臨朝願治當宁興嗟念百姓之多艱恐一夫之失所而去歲亢旱遍及江湖誦雲漢之詩而不敢康致桑林之禱而不

敢怠申飭使者分拯黎元移粟他州備修荒政究茲惠
術責在帥臣惟予廊廟舊弼之賢能體國家勤恤之意
撫綏罷病安輯流亡方略敷施功效顯著推霖雨之餘
潤活一路之生靈眷言忠勤寔副倚賴為之嘉歎至于
再三故茲獎諭想宜知悉

謝獎諭表

臣某言伏奉詔書以臣賑濟飢民招還流亡特加獎諭
臣已望闕謝恩祇受訖者宣化承流本藩方之職守念

功揚善乃國家之憲章拜賜非宜以榮為愧

中謝竊以

天地之盈虛有常數堯湯之水旱無飢民惟人事之允
修宜天災之靡害爰自兵火擾攘之後初無倉廩積粟
之儲歲一不登野有飢殍賴宸衷之軫慮底黎庶之咸
寧惟上聖博施之仁衆宜協力活一路生靈之命臣獨
何功濫膺華袞之褒益重素餐之責此蓋伏遇皇帝陛
下法天覆幬如日照臨周知臣下之勤勞寸長必錄曲
示朝廷之禮貌細札屢頒致茲孱陋之資亦冒便蕃之

寵病牛臥攏嗟筋力之易疲倦鳥思林期樊籠之可脫
己上投閒之請願施從欲之恩誓畢此生仰酬洪造

乞宮觀奏狀

右某伏奉詔書以臣近具狀奏聞乞罷帥臣之任除一
在外宮觀不允所乞仰荷聖恩第深感涕伏念臣孤陋
無取叨冒已多久居患難之中但有退休之志誤承恩
獎起帥大藩詔旨屢頒不容遜避黽勉就職倏忽踰年
雖殫夙夜之勤曾幾涓埃之補素餐之責啓處不遑兼

臣多病早衰心力凋耗憂思健忘拜跪艱難近日以來
頻在假故深恐妨廢職事有辜朝廷委寄之意屢丐閒
散實以愚誠控告君父非敢備禮況今車駕巡幸建康
江西一路號為上流重鎮在吳則周瑜魯肅之所屯守
在晉則溫嶠陶侃之所鎮臨宜得精力克壯之臣付以
禦侮折衝之任如臣不材衰病豈可冒居伏望聖慈矜
憐舊物曲賜保全特降睿旨依臣所乞除在外宮觀差
遣任便居住庶幾晚節末路猶有可言天地大恩螻蟻

難報干冒宸聰伏俟斧鉞之戮臣無任祈懇激切之至

再乞宮觀奏狀

右臣近具奏聞以臣衰病日加心力不逮深慮有誤朝廷委任乞罷帥守除一在外宮觀未奉回降指揮竊見都進奏院報左司諫陳公輔乞去以靖康間士庶伏闕為人誣其鼓倡至今猶未辨白為言伏念臣當時遭謗尤甚雖嘗蒙淵聖皇帝特降詔書宣示四方而仇怨至今以之籍口以積年往事不敢復自辨明至使諫臣援

以求去在臣愚分其何敢安伏望聖慈特降睿旨檢會
臣前奏速賜指揮除臣宮觀差遣置之閒散庶幾保全
晚節不致上累國體臣無任惶懼戰越祈懇之至

不允宮觀詔書

勅李杲所奏乞除宮觀差遣事具悉惟豫章之故郡實
吳會之扞關控制上流鞏固南服以卿輔弼寬吾顧憂
撫潢池弄兵之民當饑饉相望之後易彼儉歲化為豐
年治最彰聞璽書屢下方倚蕃宣之重共圖社稷之安

乃抗封章懇祈避謗且伏闕之往事皆不根之浮辭排
邪議以用卿斷由朕志守夙心而自信無恤人言勿復
有云往安厥位所請宜不允故茲詔示想宜知悉春暖
卿比平安好遣書指不多及

同運司乞兵捕虔賊奏狀

據吉州申契勘虔賊謝小鬼尹寶謝凱等結集二千餘
人皆是强悍累次作過徒黨自虔州興國縣前來侵犯
本州廬陵太和永豐吉水縣管下虜劫作過於十二月

二十八日衝入永豐縣正月初五日衝入吉水縣殺人放火已遣發封武節統押諸頭項官兵會合掩殺因官兵稀少頭回潰散已再差封武節整齣軍馬向前討捕今月初六日在吉水縣七里逢賊接戰勢力不加潰散內黃從義被虜袁吉州都巡傷中封武節未見下落乞差官兵前來應援安撫制置司除已差申世景下將官馬仙帶領所部兵三百人及統領官王彥選揀精銳人兵四百人前去應援捉殺外契勘今來春首正係州縣

催納苗米裝發綱運及人戶耕種之時其虔賊謝小鬼等結集兇徒作過侵犯吉州諸縣旁近州縣類皆警擾有妨官司受納裝綱及百姓耕作安撫制置司雖已遣發人兵前去應援緣祇有申世景一項軍馬一千餘人除遣發外人數不多竊慮賊勢猖獗難以捍禦雖已罰下虔州及東南第六將分差將官人兵前來策應又恐虔州守臣孫佑依前占吝不肯遣發致令賊衆滋蔓竊索吉州素來兇惡之人遞相倣倣作過為患不細伏望

朝廷特降指揮於近便處疾速摘那遣發一項軍馬三
二千人前來權聽安撫制置司節制會合捉殺所有錢
糧乞於本路近便州軍上供錢米內支撥不以遠近前
去討捕仍乞朝廷劄下虔州守臣不得依前占吝將兵
公共協力措置庶幾兇賊早得平殄一方寧息須至奏
聞者

乞沿淮漢修築城壘劄子

臣伏觀手詔車駕將乘茲春律駐蹕建康此誠至當甚

盛之舉也臣昨奉詔書條具邊防利害嘗論駐蹕建康
為措置之宜所當先者然其說謂淮南有藩籬之固則
建康可都宜命諸將移重兵於江北料理營田葺治城
壘則藩籬可成今大將既已移屯矣營田既已施行矣
楚泗既已修築城壘矣惟是沿淮如廬壽沿漢江如襄
鄧等處尚未措畫臣願陛下降詔劉光世岳飛乘士卒
之暇以漸修築如韓世忠之於楚張俊之於盱眙楊沂
中之於泗使名城堅壘繇亘相望以張國勢以讐敵心

又命朝廷選通知古今臣僚按行淮漢深考古跡要害
控扼之地如濡須塢牛渚圻之類築壘屯兵益務自固
使犬羊無侵突之虞貔虎有蓄銳之利以守則固以戰
則勝此今日之上策也夫守戰一道也能固守而後能
進戰是守者進之基也譬如奕碁之家凡欲勝人先須
自固此言雖小可以喻大今陛下既已斷自淵衷不貳
不疑駐蹕建康以承天意矣伏望聖慈益修戰守之備
以建中興之功天下不勝幸甚臣以衰病見丐閒散不

勝臣子愛君憂國之誠輒復自竭冒昧以聞或有可採
亦臣仰報聖恩之萬一也干瀆天聰臣無任惶懼戰越
之至

乞納級計功推賞劄子

臣伏見祖宗舊制軍功賞格以首級為法每獲一級或
轉官資或支銀絹是以當時賞功覈實無偽濫之弊自
近年以來納級計功之法廢全軍推賞之制行諸將告
捷皆以棄頭不斫橫屍滿野推墮崖谷沈溺江湖不可

計數為言遂使有司不得覈實朝廷無所考據一軍千人則千人推賞一軍萬人則萬人計功殫官爵不足以褒寵竭府庫不足以錫賚歲用之廣百倍往時罄百姓之脂膏耗朝廷之根本日益月增殊無藝極臣未見其可也今者車駕巡幸建康將定恢復中原之策則所以懋賞報功使將士知勸節以制度使國用不匱不可不深為之慮也臣愚伏望聖慈特降睿旨今後諸將告捷並計級數不得以棄頭不斫橫屍滿野推墮崖谷沈溺

江湖為言除保明驗實計級推賞外其有摧鋒陷陣疆
弩破敵立到奇功之人雖不獲級別許保奏優異推恩
庶幾實立功效之人有所激勸而朝廷無濫賞之費戡
亂定功不難致也取進止

乞用瓦木蓋置營房劄子

臣伏見朝廷以沿江州郡近多大災慮有姦細作過累
降指揮嚴行禁戢事理固當如此然臣竊謂軍馬屯聚
去處往往取辦一時祇以茆竹蓆蔭之屬蓋搭房舍以

省功力一有遺漏不可救止火力所及官司屋宇亦遭焚燹至及萬家或靡有子遺者如前日臨安鎮江太平州之類是也今車駕巡幸建康千乘萬騎理當建置營房屯駐將士謂宜寬商賈以招徠材植置官窯以燒變磚瓦下傍近州縣以摘那工匠選有材者專董其事不數月久即見就緒仍禁止民間自今不得以茆竹蓋屋已蓋造者漸行修換嚴保伍巡邏之法謹防虞器具之備以絕回祿之患其餘州郡有軍馬屯聚去處亦可依

此施行庶幾火不能作人得案堵區區愚慮干冒天聰
取進止

梁谿集卷九十三

欽定四庫全書

梁谿集卷九十四

宋 李綱 撰

表劄奏議五十六

道君太上皇帝升遐慰表

寧德皇后上僊慰表

乞推廣孝思益修軍政劄子

車駕巡幸建康起居表

論建中興之功劄子

論舉直言極諫之士劄子

乞不必遠名將帥劄子

乞差兵會合措置處寇奏狀

道君太上皇帝升遐慰表

臣某言今月初六日准尚書省劄子正月二十五日三省樞密院同奉聖旨何蘇奏使迴得大金國右副元帥書具報道君太上皇帝久違和豫厭世升遐禍變非常五情崩潰叩地號天無所迨及凡在臣庶悉同哀慕臣

已率在州官吏於今月初七日舉哀成服訖者國家鍾
九六之運鑾輿有沙漠之行遽厭棄於人寰遂上賓於
帝所徒抱遺弓之恨莫聞憑几之言臣民痛心天地改
色臣某誠哀誠痛頓首頓首伏以道君太上皇帝聖由
天縱道本生知儲精十閏之間圖治百王之上遜禪俾
於堯舜憂勤過於禹湯適遭醜類之憑陵因致翠華之
播蕩關河萬里霜露十年朔野馳心猶佇八龍之返使
輶通問空纏九土之悲恭惟皇帝陛下備極人倫敦崇

聖孝孺慕不忘於宵旰深思欲見於羹牆嘗膽枕戈夙
講奉迎之計問安視膳阻伸致養之誠罹此閔艱何以
堪處伏望為宗社之大計副生靈之至情少抑聖懷俯
從禮制冀昊穹之悔禍乘將士之奮忠報不共戴天之
讎神人所助建中興復古之烈華夏永寧

寧德皇后上仙慰表

臣某言本月初六日准尚書省劄子正月二十五日三
省樞密院同奉聖旨何蘇奉使迴得大金國右副元帥

書具報道君太上皇帝久違和豫厭世升遐寧德皇后亦已上仙禍變非常五情崩潰叩地號天無所迨及凡在臣庶悉同哀慕臣已率在州官吏於今月初七日舉哀成服訖者天柱傾而絕地維日華虧而沈月魄矧陟方於遐域尤軫慕於聖懷承命震驚拊心摧殞臣某誠哀誠痛頓首頓首伏以寧德皇后體儷宸極德合坤靈上皇資內助之賢淵聖嚴母儀之奉徽音流乎海宇懿範著於宮闈遭國步之艱難從鑾輿而出狩惟備嘗於

險阻致或爽於興居問寢龍樓莫遂九重之養傳音沙漠空遺萬國之悲恭惟皇帝陛下夙蘊孝思永懷慈訓以富貴崇高而不得盡人子之志以兵威強盛而未能報敵國之仇忽凶計之遽聞諒至情之曷處念四海亂離之未靖膺兩宮寄託之匪輕嘗瞻有為冀刷憑陵之恥茹荼雖痛願寬哀慕之情用慰在天之靈是為報親之義

乞推廣孝思益修軍政劄子

臣伏覩皇帝陛下以奉使何蘇回得金國右副元帥書
報道君太上皇帝久違和豫厭世升遐寧德皇后亦已
上仙聖情追慕孝思罔極顏色之戚哭泣之哀羣臣不
忍仰視傳於四方莫不殞涕雖遵國家舊制以日易月
而宮中自行三年之喪雖俯徇宰執百官之請七降批
答始以軍事方棘不得已而從之猶施素幄聽政於几
筵之側聖孝隆厚度越百王簡冊所載未之有也臣聞
之禮經曰父母之讎不與共戴天為匹夫而能復讎者

前史美之況於萬乘之主乎金人不道以其詐謀陵中國破都城邀兩宮以北狩而置之漠北苦寒之野飲食衣服醫藥皆不得如意以至大故此陛下不共戴天之讎也計音之來既不以時又以朝廷新有武功始遣使回具報凶問皆其姦計豈誠意哉遣發使人奔問諱日奉迎梓宮在人情固不可後然或從或違處其度內皆未可知臣恐議者又以此為敵人之重有害於吾自治自彊之術則在朝廷不得不先定其策也自建炎以來

為和議所誤專務退避國勢日蹙主威日削失天下者
太半方幸近年天啓宸衷悟和議退避之非為治具進
討之計天聲漸振寇偽震盪將有恢復之期儻或緣此
墮其計中小不忍以亂大謀則為害有不可勝言者矣
昔新城三老說高祖曰明其為賊敵乃可服高祖聽之
三軍縞素為義帝發哀率諸侯東嚮以誅項籍而漢楚
勝敗之勢遂分今陛下詔屯邊將士不用舊例盡為道
君太上皇帝舉哀其策得矣臣聞將士感憤至有感哭

連日不輟者人心戴宗追思道君太上皇帝恩德久而不忘於此可見臣願陛下順人心承天意益廣孝恩施之行事枕戈嘗膽修政攘戎以報不天之讎以刷中國之恥一飲膳一寢興無不以兩宮大故為念則必有合於天人之願者矣匹夫之孝感動天地至有魚躍于冰筍生于冬者而況陛下貴為天子富有四海孝悌之至通于神明聖心感格所欲其有不從者哉臣以愚直荷道君太上皇帝知遇雖嘗抵牾終不棄捐奉迎南都恩

撫甚渥聞問哀慟不如無生惟有孤忠願納之陛下故
敢罄其狂瞽不避斧鉞之誅妄有獻陳伏望聖慈不以
人廢言與五六大臣深議而力行之天下不勝幸甚干
冒天聰取進止

車駕巡幸建康起居表

臣某言伏覩都進奏院報車駕以二月二十七日進發
巡幸建康府者乾旋坤轉共知天意之回雷動風行頓
覺皇威之暢御六龍以于邁屯萬乘於要區三靈歡欣

四海呼舞

中賀

竊以江左之形勝莫如建鄴之雄渾自

昔稱帝王之州於今為東南之會控引淮海襟帶江湖
豈惟民物之阜蕃寔乃舟車之輻湊玉麟神璽晉以中
興虎踞龍蟠吳資用武兵戈之後王氣方隆皇帝陛下
慨國步之多艱憫帝都之未復因之天險濟以人謀高
祖之固關中戰必勝而攻必取光武之保河內利則伸
而鈍則蟠赤縣神州行遂定都於河洛靈川沃野聊茲
臨幸於江山方將張皇六師震疊中土駕馭貔虎翦屠

鯨鯢掃陵寢之氛埃葺宗廟之鐘虞恢復故境再臻太平而臣誤被宸恩濫當閭寄雖長隄新廐竊慕於韋丹顧重鎮上流有慙於溫嶠心馳魏闕莫參鴛鴦之行地近日畿益傾葵藿之志臣無任瞻天望聖激切屏營之至謹遣左朝奉郎充本司幹辦公事韓岳詣行在所奉表起居以聞臣某誠惶誠懼頓首頓首謹言

論建中興之功劄子

臣伏覩車駕以仲春令辰發軔吳門巡幸建康斷自宸

東不貳不疑慨然有恢復土宇掃清中原拯濟烝黎戡
定禍亂克翦大慙刷耻復仇之志天下臣子莫不望風
跂竦并蹈踊躍願少須臾無死以觀中興之功誠甚盛
之舉也臣竊觀自古建功立事扶持社稷之臣未嘗不
以立志為先申包胥聞伍員有覆楚之言則曰我必存
之其後哭秦庭以乞師卒如其志張柬之語武氏於荆
南江中其後卒復唐祚垂祀三百一夫發念其烈如此
而況以聖明之資為萬乘之主乎高祖之志見於不肯

鬱鬱久居漢中而與韓信論定三秦之策光武之志見於披輿地圖於信都城樓上與鄧禹論天下大計此皆志定於前功成於後初似落落難合而卒能建大功立大名定大業功施於當年名垂於後世載在典冊不可誣也恭惟皇帝陛下天錫勇智運屬艱難遵養時晦之久應機立斷幡然改圖思欲撥亂興衰光復祖宗之大業故親總六師以臨江表捨去吳越而幸建康漸為北伐之計志慮規模可謂宏遠矣臣願陛下益廣聖志擴

而充之與神為謀日新其德勿以去冬驟勝而自怠勿
以日前粗定而自安凡可以致中興之治者無不為凡
可以害中興之功者無不去有所規畫措置必以天下
為度必以施於長久可傳於後世為法則中興不難致
矣夫中興之於用兵止是一事要以修政事信賞刑明
是非別邪正招徠人材鼓作士氣愛惜民力順導衆心
為先數者既備則士奮於朝農安於野穀粟充盈財用
不匱將帥輯睦士卒樂戰用兵其有不勝者哉方今黠

寇雖強不仁不義專務變詐暴虐以脅制天下神怒人
憤莫之與親自古豈有如此而能久立國者正如隆冬
固陰沍寒層冰千里陽和既回應時消釋此理之必至
無足怪也昔者范蠡說越王勾踐以持盈者與天定傾
者與人節事者與地句踐用之國以富强然又必以人
事與天時相參然後乃能成功遂以報吳臣竊觀國家
去歲諸路豐穰今春雨暘調適又將豐歲是在我者得
天時矣正當修人事以應之以我之無覺待彼之有覺

則戡亂定功役不再籍夫何遠之有臣以固陋自靖康
以來與聞國論獨持戰守之策不敢以和議為然今十
有二年矣孤危寡與屢遭謗誣仰賴聖明曲加照察脫
身九死之濱今得承乏待罪方面恭聞戎輅臨駐江干
將大有為以成戡定之烈欣幸之情倍萬常品顧雖衰
病尚庶幾未填溝壑間獲觀陛下恢復中原攄憤千古
志願畢矣輒罄狂瞽干冒天威

論舉直言極諫之士劄子

臣伏覩二月九日手詔以太陽有異氛氣四合令中外侍從之臣遵前後詔書各舉能直言極諫之士一人將諷以過失次第施行用承天意有以見陛下克謹天戒思聞讜言銷弭變故以助中興之運甚盛德也臣竊考西漢舉賢良文學之士詳延于庭如董仲舒公孫弘晁錯之徒不過對策一篇指明時政得失至本朝設賢良方正能直言極諫科始有進卷及試六論乃對廷策其六論題雜出於經子史注疏之間所以求卓識洽聞之

士號為制科其得人如富弼張方平夏竦皆致宰輔其次如錢易錢明逸孔文仲武仲蘇軾蘇轍兄弟之流皆為名士論議有補於國家然制科之舉貫穿古今汪洋浩渺非強記博識積以歲時未易能究其業所以朝廷近年復置此科未有應令者無足怪也今者陛下以天變之故詔中外侍從之臣遵前後詔書各舉能直言極諫之士臣深慮有司拘以進卷六論牽制舉者難於得人無以仰副陛下咨訪闕失寅畏天戒之意臣愚欲望

聖慈特降睿旨將今來所舉直言極諫之士與免進卷
六論祇令對策于廷仍於制策內許其展盡無隱庶幾
直言嘉謨得以上聞其進卷六論自以待應科目之士
天下不勝幸甚取進止

乞不必遠召將帥劄子

臣伏覩陛下駕御將帥恩禮兼隆至有不遠千里召赴
行闕者燕射錫賚賜予優渥此誠足以得其心而用其
力也將帥荷眷遇之厚爭先望天光而聆玉音竭蹶造

朝惟恐居後此亦臣子之至情然臣聞古之善為將帥者非有大事不去屯所文帝欲勞棘門灞上細柳之軍則親臨之凡以三軍之命係於主帥機事之來間不容髮使帥不在軍敵人覘而知之卒有警急何以應敵今將帥既輕千里而入覲又有進對燕犒之留連邊境有虞誠不可不慮伏望聖慈留神深念自今非有大謀議不必遠召將帥如有燕賜之恩遣近臣即其軍中可也庶幾將帥得以畢精進慮為陛下敵愾禦侮以圖恢復

將來武功告成中國乂安之後念功賞勞出於曲賜朝夕進見體貌有加鐘鼓不作則遣使以訪之惟陛下所幸耳愚慮所及冒昧以聞死有餘罪惟陛下裁察取進止

乞差兵會合措置虔寇奏狀

契勘虔州管下盜賊多是舊來招安已受官資及已有差遣不曾起發赴任離去巢穴之人近緣知州孫佑措置討捕有討捕之意無討捕之術謀慮不密漏泄事機

致令皆懷反側結集復行作過如周十隆張大閑謝凱
尹寶謝小鬼等頭項不一多者數千人少者數百人遞
互入火劫掠鄉村殘破縣邑虔州管下如興國雩都虔
化瑞金等縣並遭焚毀謝小鬼等近者侵犯吉州界分
殘破永豐吉水等縣逼近州城又於太和萬載縣界內
盤泊作過本司遣發申世景下將官馬仙統押軍馬前
去會合巡尉及吉州將兵追襲斬殺五百餘級殺獲首
領蕭破洞賊勢方沮又遣統領官王彥將官王勝各統


所部軍馬前去永豐興國縣界會合巡尉討捕張大閑
周十隆尹寶李安淨等除近據虔州將官曹綱申殺獲
尹寶賊徒不計數目及據統領官王彥申已討蕩永豐
縣賊沈三千軍生擒賊首殺獲三百餘人并據吉州申
張大閑已就招安見赴州公參及據虔州將官何榮申
殺敗周十隆等復奪興國縣追襲至贛縣界殺死賊徒
五百餘人又據將官馬仙申殺賊徐聳賊徒生擒徐聳
已解吉州根勘本司已具逐項因依申朝廷外竊緣近

來周十隆與謝小鬼尹寶殘黨及自餘賊徒丁二十一
謝二十八花張細計明寶丁和尚呂添男謝凱陳八梗
廖車頭十等互相合火人數衆多雖累次殺敗尚未衰
息本司已劄下將官馬仙統領官王彥專一於永豐興
國縣措置討捕并近蒙朝廷差到福建路統制李貴下
軍馬前來會合今月初二日據李貴申已將帶所部軍
馬前來虔吉州界首會合捉殺所有隨軍老小乞於吉
州屯泊本司已劄吉州踏逐官屋及寺院屯泊並應副

錢糧外契勘虔賊累年出沒作過正如溪洞徭人不復知有王化致令虔州一州財賦催理不行傍近郡縣皆被其毒為害甚大若朝廷必欲掃蕩巢穴窮究根株為一勞永逸之計非壓以重兵且招且捕將招出頭首并桀黠徒黨押赴軍前使喚使良民漸次歸業未見其可兼虔州南安軍見有廣南劉宣湖南李才古政譚城鄧宣芳正等賊徒各數千人頭項不一李貴軍馬人數不多未可全然倚辦竊見湖北京西路宣撫使岳飛下軍

將多在鄂州屯駐見於本路起發錢糧前去應副若乘此邊境寧息別無探報之時選擇得力統制統領官摘那數千人前來本路就糧權聽本司節制令與李貴及本路兵將會合措置不數月間決可平殄將來盜賊既平之後亦須且留李貴軍馬屯泊吉州與本路兵將相為表裏彈壓使殘黨不敢復出嘯聚作過或有作過之人即時討殺此為得策若目前討捕不遣重兵只據見在兵將竊緣賊火數多官軍有限勢力疲乏別無策應

難以成功若將來賊平之後不別屯軍馬但以虔賊付之本路將兵軍力單弱必待殘破州縣屠害生靈一方震擾迺始申告朝廷遣兵應援緩不及事為患不細兼虔吉州殘破縣分賊平之後亦合體究着實蠲放稅租使民戶得以安業除已遣在朝奉郎本司幹辦公事韓呂詣朝廷稟議外伏望聖慈特降睿旨令朝廷詳酌措置施行



梁谿集卷九十四

欽定四庫全書

集部

梁谿集卷八十五至
七

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣楊汝梅

欽定四庫全書

梁谿集卷九十五

宋 李綱 撰

表劄奏議五十七

乞差趙不華等充招捉盜賊官奏狀

乞就都督府發遣得力統制官部押三二千人
前來使喚奏狀

差官體究周十隆等受招安及令李貴差人入
寨告諭奏狀

辭免轉金紫光祿大夫奏狀

周十隆不從招撫李貴進兵殺散乞差岳飛下

兵就糧討捕奏狀

乞差趙不華等充招捉盜賊官奏狀

契勘本路處吉筠袁撫州南安建昌軍等處常有盜賊
結集作過其初微細正緣巡尉不切用心向前緝捕漸
至滋蔓及至會合諸處巡尉又無節制統一乍前乍却
遂令賊徒得生姦計招誘徒黨恣行劫掠暨遣官兵前

去討殺賊徒即時分散藏伏更無蹤緒官軍既退又復
嘯聚出沒作過若不別作措置深慮搔擾州縣殘害民
良不得安業為患未已今相度欲於本司置措置招捉
盜賊官兩員不拘京朝官選人擇有風力材幹曾經捕
盜有功績之人充上項差遣依本司幹辦公事理為資
任除身分請給外遇差出措置應本路州軍有盜賊竊
發去處合行會合巡尉討捕招捉盜賊破券一道其供
給等並於本司錢內支破應本路州軍有盜賊竊發去

處合行會合巡尉討捕即差措置招捉官前去措置統
率討捕其巡尉怯懦不肯向前之人並許申本司體究
得實按劾奏聞庶幾巡尉有所統一協力向前不致誤
事盜賊易得衰息今竊見右承議郎前知臨江軍新淦
縣事趙不華右儒林郎筠州軍事判官馮汝嘉逐官委
有材幹風力在任捉獲兇惡強盜人數甚多殺獲賊首
鄒烏八及招到單子珍等績效尤著本司已保明乞優
異推恩外如蒙朝廷許置上項員闕即乞差前件官兩

員充填

小貼子

契勘本路虔吉等州盜賊時復作過即與其他諸路
帥司事體不同兼本司減罷文臣準備差遣五員外
止有幹辦官五員節次蒙朝廷差委前去逐州催促
軍器和糴軍儲等事委是闕官今來所乞措置招捉
盜賊官兩員如止許暫時措置候盜賊寧息日罷亦
乞朝廷特賜詳酌施行

契勘近日虔賊謝小鬼等侵犯吉州及張大閑周十隆等見在永豐興國縣界首作過本司已遣發兵將前去措置外其永豐縣又有一項李安淨嘯聚徒黨劫掠作過人數漸多契勘右承議郎前知臨江軍新淦縣事趙不華見得替在洪州寄居本司已逐急依所得便宜指揮差本官權充措置招捉盜賊官前去統率巡尉討捕李安淨等外伏乞睿照

乞就都督府遣發得力統制官部押三二千人前

來使喚奏狀

據統制官李貴申虔賊周十隆節次差人前去說諭朝廷德意許之自新前來公參其周十隆並不遵稟及故違江西安撫制置大使司所立日限反復並不從招撫出參依近降指揮合行討捕兼准樞密院劄子若不聽從即會合本路應干捕盜官兵等併力勦捕外竊緣周十隆所居巢穴係在山谷深僻去處徒黨衆多據貴所管官兵委是分布不着除已申虔州差發將兵外申本

司乞差兵前來會合措置勦捕施行本司契勘所管申
世景一軍止及一千餘人見今差出將官馬仙王勝孟
通統領官王彥等前去討捕吉州賊尹寶臨江軍賊李安
淨虔州虔化賊賴漏八袁州石鐵牌潘小叔等已起發
過一千二百餘人委是無兵可以差撥竊緣周十隆等
係虔州劇寇所養槍杖手三千餘人謝小鬼二千餘人
其餘頭首如謝先謝謹張收萬雲田玉盧超張迪等各
係招安已授官資差充諸州措使未曾赴任之人每名

所養槍杖手皆不下三二十人從來並聽伏周十隆使
喚今來周十隆既不遵稟朝廷指揮公參致令官軍進
討決須嘯聚徒黨抗拒官兵若官軍人數單弱不能討
捕即其餘頭項首領定須做倣作過為患不細本司累
具申呈乞就便差撥岳宣撫下一項軍馬前來同共措
置至今未奉回降指揮今據統制官李貴前項申述事
勢迫急伏乞特降指揮早賜差撥或只就都督府遣發
得力統制官部押三二十人星夜前來應副使喚不過

一兩月間決可擒捕周十隆謝小鬼等其餘首領亦可以重兵彈壓使之出離巢穴永絕後患

差官體究周十隆等受招安及令李貴差人入寨
告諭奏狀

勘會虔州興國縣管下有周十隆錢響謝小鬼等結集徒黨作過本司節次依奉朝廷指揮劄下統制官李貴措置招捕近雖據李貴申稱賊首周十隆等願受招安祇是發遣到次首領鍾珉錢寶劉集三名赴虔州公參

外其正首領周十隆等各未曾出官公參及李貴所給
公據五千道差人送入賊寨放散徒黨亦祇是據憑賊
人具到人數給與公據並不曾當官逐一揀放本司尋
訪聞得賊徒收領公據在寨實未曾放散徒衆歸業見
今依前恃嶮不肯出參遂差使臣李俊齋榜劄付李貴
差人指引入寨說諭頭首周十隆等再限三日出官公
參及令將徒黨當官逐人揀選存留強壯桀黠之人同
正次首領並行解赴本司如出違所立日限遷延不出

即會合官兵併力措置討殺及具狀申奏朝廷去訖續
准樞密院三月十四日劄子為周十隆累經招安返復
作過奉聖旨除賊首周十隆一名不赦外其餘徒衆許
其自新本司緣為逐人已自願受招安之意及再立限
差人入寨說諭亦於今月十一日再具因依申奏乞依
本司已行事理催促招諭候到司日依元降指揮特與
招撫去後至十二日准樞密院劄子周十隆等願受招
安雖已降指揮不赦緣今來既有自新之意理宜寬貸

劉付本司指揮李貴疾速措置招撫及十三日再據李貴申備據興國縣狀稱周全錢響謝雲於三月二十三日赴縣出頭公參了當即時或歸各人本住處訖本司亦已不住劉李貴催促說諭正次頭首周全等依限赴軍前公參同揀選到強壯徒伴解發前來本司外今訪聞得統制官李貴備據興國縣所申周全等赴本縣公參即不曾入縣其逐人將帶徒黨槍杖手數百人前來城外下寨係本縣知縣出城接見周十隆等便當公參

并李貴先申周十隆等願受招安已給公據五千道前去其徒黨亦未放散除已差委本司準備差遣右承直郎錢受之躬親起發前去密切體究周十隆等的實受招安事李保明供申仍計會李貴差人入寨分明告諭周十隆錢響謝小鬼等體念朝廷寬大之恩催促依限同以次首領及一行徒黨赴李貴軍前公參逐一當官揀選被驅虜脅從及老弱等人放散外及強壯桀黠人并一行正次首領令李貴量留人馬在虔州彈壓將帶

自餘人馬管押赴司出頭若違限遷延不出意在欺罔
朝廷不稟本司指揮即行進兵措置討捕須要擒獲賊
首不管走透

小貼子

契勘虔寇自來作過遞相關借槍杖手以助聲勢本
司切慮周十隆既不伏公參官軍進討必於諸頭項
下借槍杖手已出榜曉諭今來官兵止是討捕不遵
稟朝廷指揮周十隆謝小鬼兩人其餘首領謝先等

不得闕借槍杖手如有暗行闕借之人本司察探得知將來朝廷遣發大兵並須一例討殺如有却能擒捕周十隆謝小鬼等赴官並依賞格保奏推賞亦乞
審旨

辭免轉金紫光祿大夫奏狀

右臣准尚書省劄子四月十六日三省樞密院同奉聖旨李某典藩踰年民安盜息寬朕憂顧宜有褒嘉可特轉金紫光祿大夫劄送臣照會仰荷聖恩第深感涕伏

念臣孤陋無取叨冒已久居患難之中但有退休之志誤蒙恩獎起帥大藩詔旨屢頒不容遜避黽勉就職倏忽踰年雖殫夙夜之勤曾滅涓埃之補素餐之責啓處不遑廼蒙異恩特加遷秩無功之賞豈所敢當况今車駕巡幸建康江西一路號為上流重地在吳則周瑜魯肅之所屯守在晉則溫嶠陶侃之所鎮臨宜得精力克壯之臣付以禦侮折衝之任如臣不材衰病實難冒居伏望聖慈特降睿旨追寢成命仍檢會臣累奏陳乞

一在外宮觀差遣任便居住庶幾晚節末路猶有可言
天地大恩螻蟻難報所有特轉金紫光祿大夫恩命不
敢祇受

周十隆不從招撫李貴進兵殺散乞差岳飛下兵
就糧討捕奏狀

准樞密院都督府劄子樞密院奏勘會昨降指揮令李
貴將帶全軍前去招捕虔吉盜賊其本軍已入江西界
多日並未見申到招捕火數措置次第今據江西安撫

制置大使司申虔賊周十隆等於今年正月內結集賊徒在虔化等縣殺人放火作過大段猖獗顯見本軍遷延玩寇不為速行措置致賊滋蔓兼周十隆係累經招安授官後來返復作過理難容貸三月十四日奉聖旨除賊首周十隆一名不赦外其餘徒衆許其自新仰李貴統率官兵疾速前去措置招捕須管生擒周十隆其擒獲人依格推賞外更支錢一千貫招到徒黨並特免罪將脅從并老弱人放令歸業留強壯人隨軍使喚務

要速得平殄無致遷延走逸滋長剉付本司催促措置
招捕施行

右勘會前項周十隆等賊徒先准指揮令統制官李貴
措置先行招撫如不聽從即會合兵將巡尉併力勦捕
本司遂不住催促李貴措置招捕近據李貴申差人賁
旗榜入寨招安取到周十隆錢響謝小鬼等願受招安
文狀只是發遣到次首領鍾珉等三名赴官外其正頭
首周十隆錢響謝小鬼等未魯赴官公參本軍雖出給

公據五千道差人送入賊寨放散徒黨亦止是據憑賊人具到人數給與公據即不曾當官逐一揀放本司尋訪聞賊徒收領公據在寨實未曾放散徒衆歸業見今依前恃嶮不肯出參本司再於三月二十八日差使臣李俊等齎榜前去入寨說諭頭首再限三日出參又劉下李貴如周十隆等依得本司所立日限出官公參即將徒黨逐一當官選揀將正次頭首并強壯桀黠人存留並行解赴本司其被虜脅從及不堪披帶人給據放

令歸業如出違今來所立日限遷延不出即會合官兵
併力措置討捕今准前項聖旨指揮除周十隆不赦外
其餘徒衆許其自新等事理本司契勘今來周十隆錢
響謝小鬼等本司已依元降指揮再立日限差人前去
說諭出官公參未到若便遵依今降指揮施行緣一行
徒衆皆係久來附從周十隆作過之人竊慮本人誘惑
驅率別致走走透殺害平民卒難殄滅欲乞候見得周十
隆等如依得本司差人說諭赴官公參陳放徒伴了當

即候解發到本司日依朝廷元降指揮特與招撫若依前不伏出首即依今降聖旨指揮周十隆不赦行下統制官李貴等措置併力討捕施行更合取自朝廷指揮

小貼子

契勘本司累具奏聞并申樞密院都督府乞就湖北京西路宣撫使司差撥兵將前來討捕虔賊未奉回降指揮今來朝廷灼見周十隆過惡已降聖旨指揮不赦勢必用兵討捕竊緣虔州將兵係是土人多與

賊情相通互相閃避不肯用命兼有其餘賊火分譬前去捉殺所差到李貴下軍馬人數不多及本司官兵亦是單弱難以分布把截要害去處使不致走透深入巢穴必可擒捕今來只乞就岳飛下差撥三千人前來本路就糧討賊不過三兩月間便可討蕩又緣周十隆係虔州前後作過群賊所宗若就擒捕其他群賊皆可措置平殄既已降指揮不赦而兵力不能勝之却致猖獗則為害必大伏望聖慈特賜詳酌

早降睿旨施行

契勘軍行糧食為先若差他處軍馬前來討捕虔寇
即須又有錢糧之費如蒙朝廷就近差撥岳飛下軍
馬即於本路就支錢糧實為利便亦乞聖察

梁谿集卷九十五

欽定四庫全書

梁谿集卷九十六

宋 李綱 撰

表劄奏議五十八

同諸司乞兵應副本路急關使喚奏狀

再辭免轉官奏狀

準省劄催諸州軍起發大軍米奏狀

謝賜夏藥兼銀合茶藥表

謝轉金紫光祿大夫表

同諸司乞兵應副本路急關使喚奏狀

契勘本路自今年正月以來致已受招安人周十隆謝小鬼錢響等作過蒙朝廷差到統制官李貴部押軍馬前來措置招捕至今未見了當其鄰近州縣素來兇悍不逞之徒遞相做做嘯聚獨獍頭項不一帥司雖隨宜遣發兵將前去討捕緣軍馬單弱分俵不着以此賊徒窺見官軍次第無所忌憚結集火數漸多滋長難制雖累具申奏朝廷就便遣發軍馬前來應副使喚至今多

日未奉回降指揮遂司照對目即本路虔吉撫州南安
臨江建昌軍管下皆有盜賊作過日逐不住據逐州軍
申乞差兵收捕逐項盜賊帥司見管統制官申世景下
人兵除節次差出外別無兵將遣發今再具日近據州
縣申到盜賊已及差發兵將措置討捕下項

一虔州興國縣賊首周十隆謝小鬼依奉朝廷指揮
令催促統制官李貴措置招捕近據李貴申逐人願
受招撫除已發到錢響一名見在軍前外其周十隆

謝小鬼等並不體認朝廷寬恩許令自新之意一向推托不肯前來公參及給去公據亦不曾放散徒黨故違帥司再立日限見依朝廷指揮會合虔州將兵討殺未見了當

一據撫州等處申有虔州虔化縣賊賴花十九賴漏八賴二十四賴十七及客賊李八盧四程念八鄧軍四羅賴九等糾合一千餘人先侵建昌軍南豐縣界已次侵入撫州宜黃臨川崇仁縣衝散官兵殺人

放火劫掠作過帥司已差申世景下將官王勝管押
軍兵二百餘人前去會合巡尉討捕及就差見在永
豐縣捕賊統領官王彥軍兵四百餘人取徑路前去
措置掩捕未見申到次第

一近據袁州申萍鄉縣界見有湖南賊石鐵牌及王
權蘇勝陳老虎殘黨并吉州安福縣潘小叔賀和尚
等賊數頭項合成一火劫掠作過本州差官兵巡尉
收捕兩次衝散殺死弓兵不少見今猖獗人數已及

七八百人別無官兵捍禦委是危急帥司已逐急差元在吉州捕賊將官馬仙三百餘人前去討殺至今未見申到次第

一據臨江軍中賊人李安淨等雖被統領官王彥殺獲一百餘人生擒次首范少七等一十餘人外見有賊首李安淨并殘黨未獲出沒作過已差將官孟通軍馬討捕未得了當

一據吉州申賊徒尹寶等雖被將官馬仙殺散及擒

獲尹寶全家父母妻子等有賊首尹寶等殘黨依舊
嘯聚作過未得了當

一又據吉州申有永新縣賊王該等嘯聚四百餘人
劫掠作過及虜去虔州節推劉彥登家屬見差巡尉
前去招捕未獲

一據南安軍申近有侵犯城下作過賊人丘明殘黨
古政芳正劉思同方全朱明譚誠鄧宣等一千餘人
見在管下沙村等處作過帥司已劄差虔州將兵三

百人前去本軍同巡尉措置討捕未見申到了當

一據虔州申瑞金縣賊蔡居道等糾集徒黨二千餘人拘執催稅官權縣裴汝能殺死人吏弓兵等劫奪去係官錢物見委官前去體究及劄下虔州差將兵前去措置未見申到次第

一契勘虔州管下已招安有名目差遣不曾起離巢穴之人除周全錢響外見有張收謝先謝謐萬雲田王謝響盧超張迪等十數人各立山寨收養槍手各

係三二千人平時聽伏周全使喚今來李貴進兵其周全已與張収同共作過竊慮餘人反側不安別致生事帥司除已劄下李貴止係捕周全謝小鬼外不得以捕捉周全為名搔擾其餘已受招安人引惹生事帥司雖已出榜曉諭亦須壓以重兵使懷反側之人不敢作過

右逐司契勘本路見有前件賊火頭項不一帥司雖已分遣官軍前去收捕緣止有申世景一項軍馬除火頭

輜重外可以出戰不及千人差出討捕每頭項不過三百人伺候一處賊勢稍衰又移往一處討捕其差出兵將例皆暴露日久疲乏別無人兵可以策應抵替其李貴所部軍馬人數亦是不多深慮賊徒結集愈衆輕視官兵轉見滋蔓侵擾州縣難以制禦欲望聖慈體念一路事理非輕特賜睿旨檢會帥司累奏就都督府差撥一頭項軍馬三五千人前來本路應副急關使喚候盜賊寧息即時發遣歸元來去處所貴有所倚仗臨時不

致誤事

再辭免轉官奏狀

右臣近准尚書省劄子備奉聖旨以臣典藩踰年盜息民安宜有褒嘉特轉金紫光祿大夫尋具奏辭免伏蒙聖恩降詔不允臣不勝惶懼感激之至臣竊以帥守之職當任一路之責非若列城膺一郡之寄而已本路自今春以來虔寇作過驚擾旁郡雖遣兵討捕尋即敗獲然以軍馬單弱之故未能掃蕩巢穴窮其根株以寬朝

廷憂顧罪戾是虞何功之有儻以盜息民安為名叨冒
賞典公議謂何非獨臣所未安竇亦有累國體兼臣屢
以衰病請閑見患瘡瘍久在假故深慮妨廢職事復敢
煩言伏望聖慈特降睿旨追寢成命以安愚分仍乞檢
會臣累奏除一在外宮觀差遣任便居住異時蒙被驅
策誓極靡捐干冒天威無任戰越

准省劄催諸州軍起發大軍米奏狀

今月二十二日准行在入內內侍省降到金字牌御封

六月十七日尚書省劄子節文降到指揮令江西轉運司於去年上供等米內起發五十萬碩前去江州樁管除近除豁二萬二千二百餘碩充一路數內多科之數一萬碩應副洪州一萬碩虔州減免外有四十五萬七千七百餘碩雖近據逢運判具到已發四萬七千碩亦未見申到的實起發綱解契勘朝廷見行措置軍事其上件米斛旦暮便要支遣不可少有稽緩有誤軍食右已劄下轉運司據未發米斛限七月十五日終須管一

切數足外劄付本司更切嚴緊催促施行本司已即時牒轉運司遵依聖旨指揮火急催發施行去後今據轉運副使逢汝霖徐林公文契勘本路上供額米係以秋苗椿辦自經兵火之後多有逃閤及間有災傷年分所催稅賦例皆不及舊額其上供之數逐年並蒙朝廷除豁祇以實催米數起發照對上供米舊額一百二十六萬九千碩會計紹興六年一路實催秋苗止有九十八萬三千三百五十九碩一斗六升雖蒙減免上供一十

六萬九千碩外猶一十一萬六千石係是實催苗米外
虛數無所從出并和糴米減免三萬外收糴三十七萬
石緣虔筠州見有盜賊收糴未足截日通已糴三十四
萬三千五百九石六斗五升及紬絹折納米五萬六千
八百一十三石六斗九升三合已上三色共實合發米
一百三十八萬三千六百八十二石五斗三合依准逐
次所降指揮科撥內二十萬石應副行營左護軍四十
萬石岳太尉三十萬石張少保十一萬七千一百四十

三石七斗六升三合就支外只有三十六萬四千八百七十二石一斗係元撥付江州及改撥行營左護軍米應付老小江州椿管之數近准五月四日都督府劄子指揮於上件改撥米內轉發八萬石往廬州截日通已支發過江州椿管米共一十萬一百石外自餘未發江州米二十六萬餘石見曉夕極力催督起發伏緣本路遞年所催秋苗盡充上供外諸州不無逐急侵用數目見據洪州申科折糯米一萬三千餘石折科馬料七百

三十七石并據虔州中秋苗止納到四萬餘石遣兵招捕盜賊調發將兵支過口食別無從出不免侵支上供米九千一百餘石已係知州孫佑自劾申奏及吉州申廬陵吉水永豐太和縣共八千三百七十八戶委被虔賊燒劫逃移去年二稅無從催理已委官覆實及申尚書省乞行閣放兼虔州南安軍盜賊未息見蒙朝廷遣兵收捕有合除豁數目並在上項實催苗米之內其合起赴江州米即無四十五萬七千七百餘石之數本司

已節次開具前項秋稅不及舊額等因依供申朝廷乞以實催糴到米數起發去訖今准前項指揮本司除已遵依緊行催督逐州軍據合發米數火急依限起發外申本司并小貼子契勘本路逐年實催苗米每歲侵支殘欠常不下十餘萬石且如紹興三年計一十八萬九千二百餘石四年計三萬三千五百餘石五年係旱傷實催數少亦計十萬一千餘石所有紹興六年實催計九十八萬餘石比之遞年數多又緣盜賊未息且約侵

支殘欠一十五萬石其未發江州米二十六萬餘石若
除上項侵支殘欠一十五萬石約止有未起米一十一
萬餘石通已發過一十萬餘石共計二十一萬餘石係
江州椿管之數又小貼子契勘所催秋苗從來每年有
人戶殘零拖欠比年以軍事緊急切督責州縣嚴行拘催
如吉州有官人蕭嗣宗郭振民臨江軍鄒迪功等皆是
抵頑不納稅賦並具申朝廷已皆行遣以此可見本司
與州縣非不用心督責嚴切止緣民戶凋殘盜賊尚多

不無拖欠之數伏乞照會

右勘會江西一路自兵火殘破之後又經旱災人戶凋
耗雖去年稍得豐稔人戶未盡歸業田土荒廢尚多謂
如洪州分寧奉新等縣人戶所存纔有十之三四其餘
縣分號為多處不過十之六七通一路計之多寡相補
纔及承平之半稅賦自然難以及額又加虔州累年為
盜賊猖獗稅賦往往催科不行吉撫筠袁等州亦有盜
賊殘擾去處遂致苗稅亦多拖欠若不以實入之數起

發上供一切督迫州縣必欲及承平額數不惟無所從
出兼恐州縣不免數外科數重困人戶非獨不足以仰
副朝廷寬恤之意亦使官吏虛負罪責所有轉運司具
到前項因依伏望聖慈詳酌特降睿旨施行

謝賜夏藥并銀合茶藥表

臣某言伏蒙聖恩特降中使傳宣撫問賜臣暑藥兼銀
合茶藥臣已望闕謝恩祇受訖者憫藩方之修杆深軫
天慈賜御府之匪頒遠迂星使拜恩優渥拊已凌兢中

謝皇帝陛下道格天淵仁漸動植總英豪而駕御復土
宇之旼章知臣下之勤勞載隆體貌當炎蒸之鬱勃特
示眷存北苑靈茅滌煩銷渴上方珍劑愈病析醢顧臣
何人亦膺此賜竭犬馬之力願盡瘁於衰年進藥石之
言誓少酬於鴻造

謝轉金紫光祿大夫表

臣某言伏奉告命特轉金紫光祿大夫累具奏辭免蒙
降詔不允不得再有陳請臣已望闕謝恩祗受訖者假

守踰年未塞剖符之責誤恩增秩更叨出綽之榮雖具
列於危悼曾莫回於淵聽仰承明命彌切厚顏中謝伏
念臣猥以瑣才幸陪休運荷分閭一方之寄折長江千
里之衝撫字雖勞曾未蘇於凋瘵芟夷無術初莫變於
剝輕乏龔遂渤海之能愧汲黯淮南之治佩牛帶犢舊
習猶存裹甲橐弓茲風未見宜在黜幽之典乃蒙褒進
之恩抗章莫遂於循墻拜賜實同於臨谷寵光若此報
稱謂何此蓋伏遇皇帝陛下盛德包荒至仁善貸執賞

罰之大柄示磨勵之宏規每於臣鄰曲加體貌致此懋
賞濫及孤蹤臣敢不深體眷懷益思勉勵竭犬馬之力
雖莫報於乾坤遂縻鹿之心尚有所祈於君父

欽定四庫全書

梁谿集卷九十七

宋 李綱 撰

表劄奏議五十九

應副新虔州張覺錢糧在職待罪奏狀

乞屯兵江州防秋奏狀

措置本路盜賊奏狀

乞戒約捕賊亂行所級希求功賞等奏狀

約束統兵官招捕盜賊奏狀

乞將上供錢米應副李貴軍馬奏狀

應副新虔州張翬錢糧在職待罪奏狀

勘會近奉聖旨令湖南差統制官步諒軍馬前來江西
會合李貴措置盜賊權聽本司節制其步諒統押官兵
已到吉州本司尋行差撥前去虔州駐劄措置盜賊權
聽新知虔州張翬使喚去後今月初七日據張翬申契
勘統制官步諒軍馬一行錢糧依先降指揮合係本路
轉運司應副今來轉運司只行下虔州令於稅米內支

錢於應副安撫司錢及轉運司八色錢內支緣虔州見
今盜賊縱橫諸縣道路不通財用闕絕訪聞六月內支
軍糧米尚欠二百石支遣不過七月已後月分各合支
七千餘石未有一粒至十月方納稅米見今委無稅米
可支八月冬衣錢合支五萬貫九月賞給錢合支二萬
貫亦未有一文近蒙轉運司差屬官前來剗刷雖平準
務本錢並已刮刷盡絕委實無錢可支竊慮步諒軍馬
到州目下並無錢糧決致生事竊恭依聖旨指揮前去

赴任已到吉州訖為見虔州關乏實是怯懦逗留不敢前去交割除已具狀申朝廷乞賜先次罷黜外乞指揮移文轉運司真實那移錢米應副施行勘會新知虔州張翬近因經由洪州赴本司稟議有劄子稱虔州關乏尤甚官司窘迫目下經營無緣使有所濟乞本司支借錢米專充招捕盜賊使用本司已於昨得朝廷指揮帶糴米內支借米五千石於回易錢內支借一萬貫并支物貨等紐計二千餘貫應副前去訖今又據前項申述

契勘虔州緣諸縣各有盜賊難於催科及本州官吏有失措置遂致財賦大段闕乏目前已是闕乏錢糧支給官兵請受今來步諒一軍雖蒙朝廷指揮許於湖南樁撥錢糧應副文移往返卒未能副目前支遣其轉運司所撥名色官錢多係本州日前使過即無見存之數又有軍衣賞給等數目浩瀚本官到任之初委難責辦若非朝廷特降指揮應副決致誤事本司照對見管朝廷出賣鈔引錢一面逐急於數內支撥一萬貫并再於帶

糴米內支撥三千石給付本官及牒轉運司將實管錢
米輟那應副虔州目前急闕并劄新知虔州張翬催促星夜
起發前去赴任外所有虔州自餘闕乏錢糧伏望聖慈
特降睿旨施行

貼黃

契勘本司累具奏聞乞將本路上供錢米應副李貴
兵馬支遣却於福建路椿收元贍養李貴軍馬錢糧
起發上供及將本路月椿錢應副步諒軍馬支用却

令湖南樁收元贍養步諒軍馬錢糧就近發往鄂州
未奉回降指揮竊緣本路州縣錢米除上供月樁外
別無寬剩之數若朝廷止令轉運司趲那應副委是
無所從出伏望聖慈速降睿旨與決施行

乞屯兵江州防秋奏狀

臣竊聞思患豫防與事來輒應者利害相去甚遠平時
不思為豫防之計及事至而應豈不有誤國家之大計
耶目今偽齊之兵為劉光世等敗於淮淝之上其餘破

亡殘黨散走嘯聚往來於淮西之間蘄黃兩州既有岳
飛等軍屯駐鄂渚分布策應照得蘄黃兩州與江州實
為對境蘄黃即江州之脅背江州即江西之咽喉也萬
一敗亡之卒批亢擣虛延入內地使不豫為之計臨時
緩急調發於他郡則受敵之際旁需救援豈不誤事哉
況蘄黃等州與江州煙火相望通淮之路大小十數馬
行不過三四日步軍不過七八日便抵江面若無屯駐
軍馬防拓要害受敵必速池鄂救援非月餘不至何益

於事臣竊謂淮西之舒蘄與淮東之通泰事頗相類京
口無兵則無以護通泰九江無兵則無以援舒蘄舒蘄
不守則江西受敵矣臣已依指揮將江西等州兵將許
臣勾抽使喚照得江西盜賊已漸寧息將遂州所屯駐
兵勾抽一半起發分布控扼所有一半仍舊屯駐討捕
盜賊未至淨盡去處其隸將兵雖例前去差撥竊慮遂
州占吝不為發遣兼蒙朝廷差到李貴步諒人兵皆在
虔州措置盜賊相去遠緩急難以勾抽使喚沿江一

帶險要去處并無人兵可以分布防守况車駕駐蹕建康如江州等處最為上流重地又與去年防秋事體不同理宜分屯大兵以為控守朝廷必已行下措置本司並未曾被受指揮伏望聖慈特降睿旨早賜詳酌施行
措置本路盜賊奏狀

契勘臣去年春夏間到官之初適當旱歲米斗至千餘錢盜賊稀少蓋緣遠方之民但見朝廷除本路安撫制置大使意謂所統軍馬必多巨寇皆不敢起小盜隨亦

寧息至今年春因虔州官吏失於撫循引惹生事致周
十隆謝小鬼等殘破屬邑侵犯吉州永豐吉水等縣本
司差將兵前去討捕每頭項不過數百人雖幸殺敗遏
其克焰使復歸巢穴然兵力單弱不能深入窮其根株
相繼福建路李貴一項軍馬前來與賊相持山林險阻
之地久未有功旁近克徒窺見官軍勢力弗強皆有跳
踉之志雖去歲豐稔粒米狼戾斗米不過百錢而鼠竊
狗偷紛紛不已誠有以致之也虔化賴漏八楊三十四

兩項賊徒相繼侵犯撫州勢頗飄暴本司遣統領官王
彥將本部軍馬前去會合臨川知縣王時率弓兵土豪
深入討捕已招降到楊三十四等其賴漏八等亦為土
豪所殺見擒捕到徒黨數十人付撫州建昌軍推治袁
州萍鄉縣有湖南及吉州太和縣賊徒石鐵牌鍾牛皮
賀和尚等嘯聚作過本司遣申世景下將馬仙將所部
軍馬前去討捕並已招捉了當筠州高安縣近有熊清
等賊徒去城數十里劫掠人戶知縣步汝霖縣尉李聃

年躬親前去討捕為賊所害及殺傷官兵弓手土豪甚衆本司遣發統領官王彥前去討捕已擒獲賊首熊清等八名解赴本司凌遲處斬訖并斬賊徒一十六級見委巡尉搜捕殘黨惟是吉州永豐縣賊首李安淨出沒於崇仁新淦永豐等縣作過雖中間為王彥殺獲徒黨一百二十餘人又復嘯聚至今猶未敗獲不逞之徒往往借其聲勢劫掠村疇本司近已再遣王彥自筠州前去會合已遣軍馬須管於日下捕獲外撫吉筠袁等州

目下別無作過盜賊惟是虔州周十隆謝小鬼與其餘已受招安不離巢穴之人如張収等十數項賊徒深慮秋冬之交結集作過又有劉宣一項賊馬見在本路與廣東兩界首及古政李才等數千人見在湖南與本路兩界首來往作過今冬勢須過為隄防臣已與新知虔州張翬商議措置屯李貴步諒兩軍於旁近遣元係本州招安使臣羅武賴勝錢響等入賊說諭周十隆謝小鬼張収等令放散徒黨赴州公參與免罪犯不奪已補

官資其家依舊聽納租稅因令挈家居於州城漸次發遣赴本司聽候朝廷指揮其有不從者會合軍馬討捕更不招安庶幾革去舊習不至養成後患所有劉宣古政李才等賊徒一面遣發東南第六將兵前去討捕伏望聖慈降旨朝廷更賜指揮施行

乞戒約捕賊亂行所級希求功賞等奏狀

契勘本路州縣管下遇有盜賊作過遣發官兵前去討捕其統兵招捉官多是逼逐賊徒出界或擒獲到此小

徒伴便於申報捷狀內循習近年體例妄稱與賊見陣棄頭不所追殺數十里橫尸徧野墮落崖谷渰溺江河不知其數殘零賊徒別無蹤緒其招到賊火亦不令出公參及揀選存留強壯人上稱並已給擬放散遂致賊徒得為姦計聚散出沒終不敗獲兼保明功狀難以覈實推賞本司已行下統兵官仰今後捉殺盜賊告諭士卒如遇見陣殺敗賊徒並須要所列首級赴官驗認其生擒之人不得殺戮盡數押赴統兵官前驗實解送所

屬根勘如在兩界首討捕不以遠近追襲即不得以趕散出界為名便行抽回軍馬仍仰統兵官置籍錄記立功姓名功狀具的確見陣得功因依殺到首級及生擒人數結狀保明供申以憑委官檢驗陣場覈實推賞仍戒約不得亂將平民殺害斫級充數希求功賞如本司覺察得知其統轄官部隊使臣以下並當次第重有行遣若委有逼逐落崖溺水之人亦仰統兵官驗實保明的確死損人數同申即不得依前泛濫供報如遇招安

賊火仍遵依前所行指揮盡要正次首領出官公參拘
收器械燒毀寨柵將一行徒伴揀選強壯堪披帶之人
並行存留在軍具數申取指揮施行外伏望聖慈特降
睿旨令朝廷更賜詳酌行下庶幾有所遵守

約束統兵官招捕盜賊奏狀

勘會虔州管下見有兇賊周十隆謝小鬼等結集作過
累准朝廷及都督府指揮令本司催督李貴措置招撫
如不聽從即會合將兵討捕本司尋行下李貴催督導

依施行及一十三次劄下虔州四次劄下東南第六將
催差將兵起發前去會合討捕六次據虔州申承李貴
申周十隆等不從招撫乞差將兵前來討捕已帖將官
曹綱日下部領將兵前去本司續又五次徑劄下曹綱
催促進發至五月初五日據李貴申周十隆等不從招
撫已兩次進兵殺敗賊徒外賊首周十隆謝小鬼及自
餘賊徒走散未獲已申虔州乞差將兵巡尉前來會合
討捕至今未到本司遂行下取問本州及將官曹綱具

拆違慢不即起發將兵前去會合因依及具狀申乞朝
廷指揮施行去後又經多日並不曾據曹綱申到已起
發文狀五月二十二日據虔州五月十四日狀申方稱
見帖將官曹綱部領將兵日起下離前去會合李貴討
捕又未見得委的曾與不曾起發顯是將官曹綱全不
體認朝廷累降指揮及不聽從本司節制致誤會合討
捕走透賊徒緣本州相去虔州及東南第六將地里遙
遠每有行下調發等事動經旬日方到今來本州管下


見有盜賊作過頭項不一似此帥司號令不行緩急必致誤事欲望聖慈特降睿旨施行

乞將上供錢米應副李貴軍馬奏狀

右臣契勘近蒙朝廷以本路見有盜賊闕兵討捕差到李貴步諒兩軍人馬除步諒壹軍撥就虔州駐泊已奉指揮以月椿錢應副卻令湖南收簇撥還湖北宣撫司外有一軍見在吉州駐泊雖與步諒人數不相遠然請受則例過之三倍步諒一軍月費錢四千餘貫米八百

餘石李貴一軍并老小月費錢一萬二千餘貫米一千四百餘石本司累具申奏乞令本路將上供錢米應副贍養卻令福建路收簇撥還未奉回降指揮止是令轉運司趙那應副轉運司亦別無擘畫止是令州縣自行措置目今據吉州申錢糧闕乏無可應副竊慮別致生事臣契勘見今虔吉間盜賊雖節次討捕稍安巢穴緣巨盜頭首如周十隆謝小鬼劉宣古才尹寶等並未曾捕獲遞相結集至秋冬之交決須作過若有錢糧贍養

李貴一軍存留本路彈壓庶幾至時不致猖獗若錢糧
贍養不足日有目前之憂即將來盜賊亦不暇恤李貴
在福建與本路贍養之費惟均而利害相萬俱望聖慈
特降睿旨令朝廷更加詳酌如李貴一軍別無錢糧應
副贍養即乞於岳飛軍中差撥三二千人前來本路就
用錢糧彈壓討捕其李貴軍馬候岳飛下兵將到日發
回福建路駐劄仍乞早降指揮施行



梁谿集卷九十七